

- प्रधानमंत्री नरेन्द्र मोदी रो 22 मई ने बीकानेर दौरा रो कार्यक्रम—देश रा 100 ऊं बत्ता आधुनिक रेलवे टेशनां रो वर्चुअल तरीका ऊं उद्घाटन करेलां
- रक्षा मंत्री राजनाथ सिंह अंतर्राष्ट्रीय मुद्रा कोष ऊं पाकिस्तान ने माली मदद देवण माथे ओजू विचार करण बाबत् कह्यो
- माउंट आबू मांय काल ग्रीष्म महोत्सव सुरू व्हेला—तीन दिन रा आयोजन मांय न्यारा—न्यारा सांस्कृतिक कार्यक्रम अर केई होड़ां राखी जावेलां
- प्रदेश मांय जेठ महीना मांय ई मौसम रो मिल्यो—जुल्यो मिज़ाज—केई ठौड़ां आंधी—बारिश तो कटे—कटे ज़ोरदार गर्मी

000

प्रधानमंत्री नरेन्द्र मोदी रो 22 मई ने बीकानेर रा दौरा सारू पधारण रो कार्यक्रम हैं श्री मोदी देशनोक ऊं अमृत भारत स्टेशन योजना रा तैत देशभर मांय बणायी ज्या नुवा रेलवे टेशनां ने डिजिटल तरीका ऊं जनता ने सूपेलां ई दौरान वां रो आम सभा ने सम्बोधित करण रो ई कार्यक्रम हैं ई मौके मुख्यमंत्री भजन लाल शर्मा, रेल मंत्री अश्विनी वैष्णव अर केन्द्रीय मंत्री अर्जुनराम मेघवाल ई मौजूद रहवेलां प्रधानमंत्री रो नाल हवाई अड्डा माथे फौज रा जवानां सागे बातचीत करण अर देशनोक रा करणी माता मिन्दर मांय दर्शन करण रो ई कार्यक्रम हैं प्रधानमंत्री रा प्रस्तावित दौरा ने ध्यान राखता थकां प्रशासन सगळी ज़रूरी तैयारियां कर रह्यो हैं मुख्य सचिव सुधांशु पंत आज जयपुर मांय अहलकारां री मीटिंग ले र सगळी ज़रूरी तैयारियां टेमसर पूरी करण रा हुकम दीनां

000

रक्षा मंत्री राजनाथ सिंह कह्यो हैं के अंतर्राष्ट्रीय मुद्राकोष ने पाकिस्तान ने दी जा रही माली मदद रा बारा मांय ओजू विचार करणो चाहिये वे आज गुजरात रा भुज मांय वायुसेना अड्डा परां फौजियां ने संबोधित कर रह्या हां श्री सिंह कह्यो के पाकिस्तान मदद री ई रकम रो मोटो हिस्सा आतंकी ढांचा ने ओजू ऊबो करण मांय लगावेलां रक्षा मंत्री कह्यो के मौजूदा दौर मांय पाकिस्तान ने माली मदद देवण रो मतलब आतंकी गतिविधियां सारू रकम मुहैया करावणो हैं वे ऑपरेशन सिंदूर मांय वायुसेना री तुरत अर निर्णायक कार्रवाई री सराहवणा कीनीं रक्षा मंत्री कह्यो के इण ऊं देश—परदेश मांय सगळा भारतीयां रो माथो ऊंचो व्ह्यो हैं राजनाथ सिंह कह्यो के ओ ऑपरेशन आतंकवाद रे खिलाफ करड़ो संदेश है अर ओ देश री फौजी ताकत रो दरसाव करे हैं

.....

ऑपरेशन सिंदूर री कामयाबी पाछे फौज रा जवानां रा मान मांय प्रदेश मांय न्यारी—न्यारी ठौड़ां तिरंगा यात्रा निकाळी जा रही हैं कोटा रा रामपुरा मांय निकाळी जा रही तिरंगा यात्रा मांय लोकसभा अध्यक्ष ओम बिरला ई सिरकत कर रह्या हैं

किशनगढ़ कने राजस्थान केन्द्रीय विश्वविद्यालय री ओर ऊं ई तिरंगा रैली निकाळी ज्यीं विश्वविद्यालय रा कुलपति प्रोफेसर आनन्द भालेराव बतायो के रैली मांय विद्यार्थियां अर विश्वविद्यालय रा कर्मचारियां सागे आरे—सारे रा गांवां रा लोग ई बढ़—चढ़ र सिरकत कीनीं राज्य मांय न्यारा—न्यारा रेलवे टेशनां ने ई तिरंगी रोशनी ऊं सजायी ज्या हैं डूंगरपुर रा देव सोमनाथ

मिंदर मांय खास सजावट करी ज्यी हैं आकाशवाणी ऊं ई इण ई सिलसिला मांय खास कार्यक्रम प्रसारित कर्या जा रह्या हैं एक कार्यक्रम मांय रिटायर्ड कर्नल अनिल माथुर नौजवानां ऊं ऑपरेशन सिन्दूर सीख ले र देश सेवा ने सब ऊं ऊंची राखण री अपील कीनीं

राष्ट्रपति द्रौपदी मुर्मू आज नई दिल्ली मांय संस्कृत रा विद्वान स्वामी रामभद्राचार्य ने साल 2023 रो ज्ञानपीठ पुरस्कार दे र नवाजां स्वामी रामभद्राचार्य अर नामी उर्दू कवि अर गीतकार गुलज़ार ने साल 2023 रा ई प्रतिष्ठित पुरस्कार सारू चुणी ज्या हैं ई मौके राष्ट्रपति दोन्यू साहित्यकारां ने बधाई दीनीं स्वामी रामभद्राचार्य ईनाम ऊं नवाजा जावण परां खुशी जताता थकां कह्यो के इण ऊं वां रा सहित्य कामां ने मान्यता मिली हैं

000

विधानसभा अध्यक्ष वासुदेव देवनानी कह्यो है के विकसित भारत रो सपनो सांचो करण सारू हर हर एक जणा री भागीदारी जरूरी हैं श्री देवनानी आज जयपुर मांय पत्रकार मनोज माथुर री याद मांय राखी ज्या पत्रकार सम्मान समारोह मांय बोल रह्या हां वे कह्यो के नुवो बेहतरीन भारत बणावण अर लगातार आगे बधावण सारू सगळां ने सक्रिय भूमिका निभावणी चाहिजें वे कह्यो के लोकतंत्र मांय पत्रकारां रो खास काम व्हे हैं विधानसभा अध्यक्ष पत्रकारां ऊं देशभक्ति री भावना जगावण अर सकारात्मक माहौल बणावण री अरज कीनीं

जळसा मांय प्रिन्ट मीडिया श्रेणी मांय अवधेश आकोदिया, इलेक्ट्रॉनिक मीडिया मांय महेश दाधीच अर डिजिटल मीडिया मांय सौरभ भट्ट रो मान करी ज्यों

000

लोकसभा अध्यक्ष ओम बिरला आज कोटा मांय जनसुणवाई कीनीं ई दौरान वे लोगां री परेशानियां सुण र अहलकारां ने वां रा समाधान रा हुकम दीनां श्री बिरला स्थानीय मुद्दां माथे ई जनता सागे बातचीत कीनीं खबरनवीसां सागे बातचीत करता थकां श्री बिरला कह्यो के लोकतंत्र मांय बातचीत जरूरी है अर इण ऊं केई परेशानियां रो हल निकळे हैं

000

सिरोही जिला रा माउंट आबू मांय काल ग्रीष्म महोत्सव सारू व्हेलां तीन दिन रा ई उत्सव मांय राजस्थानी संस्कृति अर भांत-भांत रा रीति-रिवाज सागे केई होड़ां निजर आवेलां म्हाणा खबरनवीस बतायो के ई दौरान नक्खी झील मांय नावां री दौड़ ई करायी जावेलां

प्रदेश ने ऊर्जा रा हलका मांय खुद रे पाण ऊबो करण सारू सरकार केई जतन कर रही हैं अजमेर विद्युत वितरण निगम लिमिटेड चित्तौड़गढ़ जिला मांय हाल ताई सूरज री रोशनी बिजली बणावण री पांच मोटी मशीनां लगायी हैं कुसुम योजना रा तैत साड़ास, जावदा, बांगेड़ाघाटा अर इन्दौरा मांय लगायी ज्यी आं मशीनां ऊं चालीस हजार यूनिट बिजली बणाबा लागी हैं आवता बगत मांय डिस्कॉम री ओर ऊं जिला मांय 38 मेगावॉट बूता रा 25 प्लांट और लगाया जावेला, ज्यों पाछे और बत्ती बिजली बणायी जा सकेलां

000

हाल ही पूरा व्ह्या खेलो इण्डिया यूथ गेम्स मांय राजस्थान सोना रा 24, चांदी रा 12 अर कांसा रा 14 तमगा जीत र तीजी ठौड़ माथे रह्यो राजस्थान राज्य क्रीड़ा परिषद् रा प्रबंधक रण विजय सिंह आकाशवाणी सागे बातचीत रे दौरान बतायो के राज्य रा खिलाड़ी लारला साल तमिलनाडू मांय व्ह्या खेलो इण्डिया यूथ गेम्स रे मुकाबले चोखो खेल बतायो वे बतायो के राजस्थान सब ऊं बत्ता 14 तमगा साईकल चलावण री होड़ां मांय हासिल कीनां

प्रदेश मांय आज केई ठौड़ा लू बाजी जद के भीलवाड़ा, बूंदी, कोटा, टोंक, दौसा, अलवर अर भरतपुर मांय कठे-कठे आंधी चालण अर बिरखा व्हेवण रा आसार हैं हनुमानगढ़, बीकानेर, श्रीगंगानगर अर जोधपुर समेत केई ठौड़ां पड़ रही ज़ोरदार गर्मी ऊं लोग परेशान रह्यां मौसम विभाग आवता दो दिन प्रदेश रा 10 जिलां मांय आंधी चालण अर बारिश व्हेवण सारू चेतायो हैं आं मांय कोटा अर उदयपुर संभाग रा केई जिला शामिल हैं दूजी कानी राज्य रा आतूणी हलका मांय

तेज़ गर्मी अर लू रो असर रेहवण री संभावना हैं लारला चौबीस घंटां मांय राज्य रा 9 शहरां मांय पारो 43 डिग्री सेल्सियस ने पार कर ग्यों श्रीगंगानगर मांय सब ऊं बत्तो 45 दशमलव 8 डिग्री सेल्सियस तापमान रह्यो, जद के उदयपुर अर बांसवाड़ा मांय केई ठौड़ां हल्की बरसात व्हीं

000

रणथम्भौर बाघ परियोजना हलका री फलोदी रेंज मांय बाघिन टी 2302 रा 3 नुवा बच्चा निजर आया हैं ई पाछे वन विभाग ई हलका मांय असरदार निगराणी रा हुकम दीना हैं नुवा शावकां ऊं जंगली जिनावरां ने निरखण वाळां अर सैर-सपाटा ऊं जुड़्या कारोबारियां मांय उमाव हैं

000